

Ո Ր Ո Շ ՈՒ Մ թիվ - 426.
Վարչական տույժ նշանակելու մասին

«24» դեկտեմբերի 2021թ.

ք. Երևան

ՀՀ պետական եկամուտների կոմիտեի իրավաբանական վարչության պետ Արման Մնացականյանս, քննելով Հայկազ Արմենակի Ամիրխանյանի վերաբերյալ նյութերը.

Պ Ա Ր Զ Ե Ց Ի

2021 թվականի դեկտեմբերի 1-ին ՀՀ ՊԵԿ մաքսանենգության դեմ պայքարի վարչության աշխատակիցները «Ապավեն Տերմինալ» ՓԲ ընկերության մաքսային հսկողության գոտում զննման են ենթարկել Իրանի Իսլամական Հանրապետությունից «Հայկազ Ամիրխանյան» ԱԶ-ի անվամբ ՀՀ ներմուծված և թիվ 05100010/301121/0078051 ապրանքների հայտարարագրով հայտարարագրված և «դեղին ուղի» մաքսային ընթացակարգով բաց թողնված բեռը:

Զննման արդյունքում պարզվել է, որ թիվ 05100010/301121/0078051 ԱՀ-ի 3-րդ ապրանքային դիրքում ԱՏԳ ԱԱ 73239400000 ծածկագրով հայտարարագրված՝ 400 կգ համաքաշով և 340 կգ զտաքաշով «խոհանոցային թավաների հավաքածու սև մետաղից, էմալապատ, 100 հատ» նկարագրությամբ ապրանքի փոխարեն փաստացի առկա է եղել վերոնշյալ համաքաշով և զտաքաշով այլումինե կաթսաների և թավաների հավաքածու՝ ապակյա կափարիչներով, այսինքն՝ ապրանքների հայտարարագրում նշվել են ոչ ճշգրիտ տեղեկություններ ապրանքի նկարագրության և ԱՏԳ ԱԱ ծածկագրի վերաբերյալ:

Փաստի առթիվ ՀՀ մաքսային օրենսգրքի 203-րդ հոդվածի հատկանիշներով Հայկազ Ամիրխանյանի նկատմամբ կազմվել է մաքսային կանոնների խախտման վերաբերյալ արձանագրություն, իսկ ապրանքները, որպես իրավախախտման անմիջական օբյեկտ, վերցվել և ի պահ են հանձնվել «Ապավեն Տերմինալ» ՓԲ ընկերության մաքսային հսկողության տարածքում:

Հայկազ Ամիրխանյանը ՀՀ ՊԵԿ ՄԴՊԿ-ում բացատրություն է տվել այն մասին, որ որպես անհատ ձեռներեց մոտ երկու տարի զբաղվում է տարբեր ապրանքների ներմուծմամբ: ՀՀ ՊԵԿ մաքսային մարմնի աշխատակիցների կողմից ապրանքների զննման արդյունքում պարզվել է, որ թիվ 05100010/301121/0078051 ԱՀ-ի 2-րդ ապրանքային դիրքում հայտարարագրված խոհանոցային թավաների հավաքածու՝ սև մետաղից և էմալապատ ապրանքի փոխարեն փաստացի առկա է այլումինե կաթսաների և թավաների հավաքածու՝ ապակյա կափարիչներով, իսկ մյուս ապրանքային դիրքերում առկա ապրանքները համապատասխանում են իրականին:

Վերջինս հրավիրվել է ՀՀ ՊԵԿ իրավաբանական վարչություն վարչական վարույթի մասնակցության, սակայն վերջինս հայտնել է, որ ավելացնելու ոչինչ չունի և պատրաստ է կատարել վերահայտարարագրում:

07.12.2021թ. թիվ Ն/11-3/221281-2021 գրությամբ հարցում է կատարվել ՀՀ ՊԵԿ Արարատյան մաքսատուն-վարչություն՝ պարզելու համար «Հայկազ Ամիրխանյան» ԱԶ-ի անվամբ ԻԻՀ-ից ՀՀ ներմուծված թիվ 05100010/301121/0078051 ապրանքների հայտարարագրով հայտարարագրված ապրանքների վերաբերյալ ճշգրիտ տեղեկություններով հայտարարագրելու դեպքում առաջանում են արդյոք ոչ սակագնային կարգավորման միջոցներ, ինչպես նաև պակաս հաշվարկված մաքսային վճարներ, թե՛ ո՛չ:

ՀՀ ՊԵԿ Արարատյան մաքսատուն-վարչության 24.12.2021թ. թիվ Ն/20-1/233332-2021 գրության համաձայն՝ ԱՀ-ը ճշգրիտ տվյալներով հայտարարագրելու արդյունքում, առ 30.11.2021թ. դրությամբ առաջացել են պակաս հաշվարկված մաքսային վճարներ՝ ընդհանուր 272939 ՀՀ դրամի չափով՝ 196731 ԱԱՀ-ի գումար և առաջացել է պակաս հաշվարկված

մաքսատուրքի գումար՝ 76208 ՀՀ դրամի չափով: Միաժամանակ հայտնել են, որ չեն առաջացել ոչ սակագնային կարգավորման միջոցների ներկայացման պահանջ և առաջացել է պակաս հաշվարկված հակագնագցման տուրքի գումար՝ 318214 ՀՀ դրամ:

ԵԱՏՄ մաքսային օրենսգրքի (այսուհետ՝ Օրենսգիրք) 2-րդ հոդվածի 32-րդ կետի համաձայն՝ «մաքսային հայտարարագիրը» մաքսային փաստաթուղթ է, որը պարունակում է տեղեկություններ ապրանքների վերաբերյալ կամ ապրանքների բացթողման համար անհրաժեշտ այլ տեղեկություններ, իսկ 7-րդ կետի համաձայն՝ հայտարարատուն այն անձն է, որը հայտարարագրում է ապրանքներ կամ որի անունից հայտարարագրվում են ապրանքներ:

ԵԱՏՄ մաքսային օրենսգրքի 35-րդ կետի համաձայն՝ մաքսային հայտարարագրումը մաքսային մարմնում մաքսային հայտարարագրի միջոցով ապրանքների վերաբերյալ տեղեկությունների, ընտրված մաքսային ընթացակարգի վերաբերյալ և (կամ) ապրանքների բացթողման համար անհրաժեշտ այլ տեղեկությունների հայտագրումն է:

ԵԱՏՄ մաքսային օրենսգրքի 104-րդ հոդվածի համաձայն՝ ապրանքները ենթակա են մաքսային հայտարարագրման դրանք մաքսային ընթացակարգով ձևակերպելու կամ սույն Օրենսգրքին համապատասխան սահմանված այլ դեպքերում: Մաքսային հայտարարագրումն իրականացվում է հայտարարատուի կամ մաքսային ներկայացուցչի կողմից, եթե սույն օրենսգրքով այլ բան սահմանված չէ: ԵԱՏՄ մաքսային օրենսգրքի 105-րդ հոդվածի համաձայն՝ մաքսային ընթացակարգերով ձևակերպելիս, բացառությամբ «մաքսային տարանցում» մաքսային ընթացակարգի, մաքսային մարմին է ներկայացվում ապրանքների մասին հայտարարագիր:

ԵԱՏՄ մաքսային օրենսգրքի 106-րդ հոդվածով սահմանվում են ապրանքների հայտարարագրերում նշման ենթակա տեղեկությունները: 106-րդ հոդվածի 1-ին մասի 4-րդ կետի համաձայն՝ հայտարարագրում նշվում են տեղեկություններ ապրանքների մասին, որոնց մեջ ի թիվս այլոց նշվում գինը, քանակը:

Օրենսգրքի 84-րդ հոդվածի 3-րդ կետի համաձայն՝ հայտարարատուն անդամ պետությունների օրենսդրությանը համապատասխան, պատասխանատվություն է կրում սույն հոդվածի 2-րդ կետով նախատեսված պարտականությունները չկատարելու, մաքսային հայտարարագրում ոչ հավաստի տեղեկություններ հայտագրելու համար:

ՀՀ մաքսային օրենսգրքի 189-րդ հոդվածի 1-ին և 2-րդ մասերի համաձայն՝ մաքսային կանոնների խախտում է համարվում անձի կողմից կատարված անօրինական գործողությունը կամ անգործությունը, որն ուղղված է Հայաստանի Հանրապետության միջազգային օրենսդրությամբ և մաքսային ոլորտին առնչվող Հայաստանի Հանրապետության միջազգային պայմանագրերով Հայաստանի Հանրապետության մաքսային սահմանով տեղափոխվող ապրանքների և տրանսպորտային միջոցների մաքսային հսկողության և մաքսային ձևակերպման սահմանված կարգի դեմ, և որի համար սույն օրենսգրքով նախատեսված է պատասխանատվություն: Ֆիզիկական և պաշտոնատար անձինք մաքսային կանոնները դիտավորյալ կամ անզգուշորեն խախտելու համար ենթակա են պատասխանատվության:

ՀՀ մաքսային օրենսգրքի 203-րդ հոդվածի 1-ին մասի 2-րդ պարբերության համաձայն՝ Հայաստանի Հանրապետության մաքսային սահմանով տեղափոխվող ապրանքները և տրանսպորտային միջոցները չհայտարարագրելը կամ ոչ իրենց անվանմամբ հայտարարագրելը կամ հայտարարագրման ժամանակ ոչ ճշգրիտ տեղեկություններ նշելը, որի արդյունքում առաջանում է մաքսային վճարների պակաս հաշվարկում կամ չհաշվարկում, առաջացնում է տուգանք՝ այդ մաքսային վճարների 50 տոկոսի չափով:

Հայկազ Արմենակի Ամիրխանյանը 2021 թվականի դեկտեմբերի 24-ին հրավիրվել է ՀՀ ՊԵԿ իրավաբանական վարչություն՝ իրենց նկատմամբ ՀՀ մաքսային օրենսգրքի 203-րդ հոդվածի հատկանիշներով սկսված վարչական գործի քննությանը մասնակցելու համար, սակայն վերջինս չի ներկայացել:

Այսպիսով, գործի նյութերով պարզվել է, որ «Հայկազ Ամիրխանյան» ԱԶ-ի անվամբ թիվ 05100010/301121/0078051 ապրանքների հայտարարագրով ՀՀ է ներմուծվել փաստացի 400 կգ համաքաշով և 340 կգ զտաքաշով «ալյումինե կաթսաների և թավաների հավաքածու՝ ապակյա կափարիչներով» նկարագրությամբ ապրանք, որը թիվ 05100010/301121/0078051 ապրանքային հայտարարագրի 2-րդ ապրանքային դիրքում հայտարարագրվել է որպես «խոհանոցային թավաների հավաքածու սև մետաղից, էմալպատ, 100 հատ» նկարագրությամբ ապրանք, ինչի հետևանքով առաջացել են 272939 ՀՀ դրամի չափով պակաս հաշվարկված մաքսային վճարներ, այսինքն՝ Հայկազ Արմենակի Ամիրխանյանը թույլ է տվել ՀՀ մաքսային օրենսգրքի 203-րդ հոդվածի 1-ին մասի 2-րդ պարբերությամբ նախատեսված մաքսային կանոնների խախտում, ինչը հիմնավորվում է 01.12.2021թ.-ին կազմված մաքսային կանոնների խախտման վերաբերյալ արձանագրությամբ, Արարատյան մաքսատուն-վարչության 24.12.2021թ. թիվ Ն/20-1/233332-2021 գրությամբ, Հայկազ Արմենակի Ամիրխանյանի բացատրությամբ և թիվ 05100010/301121/0078051 ապրանքային հայտարարագրով:

Վերոգրյալի հիման վրա և ղեկավարվելով ՀՀ մաքսային օրենսգրքի 203-րդ հոդվածի 1-ին մասի 2-րդ պարբերությամբ, 206-րդ, 221-րդ և 224-րդ հոդվածներով,

Ո Ր Ո Շ Ե Ց Ի՝

1. Հայկազ Արմենակի Ամիրխանյանին (անձնագրի համար՝ AT0506739) ճանաչել զանցառու ՀՀ մաքսային օրենսգրքի 203-րդ հոդվածի 1-ին մասի 2-րդ պարբերությամբ և նրան տուգանել պակաս հաշվարկված մաքսային վճարների 50 տոկոսի չափով՝ 136469 ՀՀ դրամ:

/900005024055 (կող-19) հաշվեհամարին/

2. Վերցված ապրանքները կարող են վերադարձվել մաքսային ձևակերպումները կատարելուց, տուգանքի վճարումից, մաքսային վճարների և պարտավորությունների կատարումից հետո՝ մեկ աշխատանքային օրվա ընթացքում:

3. ԵԱՏՄ մաքսային օրենսգրքի 98-րդ հոդվածի 4-րդ մասի համաձայն՝ որոշումն ուժի մեջ մտնելու օրվան հաջորդ օրվանից ոչ ուշ, քան 10 օրացուցային օրվա ընթացքում վերցված ապրանքները պետք է հանձնվեն ժամանակավոր պահպանման:

4. Որոշման մասին հայտնել Հ. Ամիրխանյանին՝ պարզաբանելով ՀՀ մաքսային օրենսգրքի 221-րդ հոդվածի 2-րդ մասի համաձայն՝ որոշումն ուժի մեջ է մտնում կայացման պահից: ՀՀ մաքսային օրենսգրքի 222-րդ հոդվածի համաձայն՝ որոշումը կարող է բողոքարկվել վերադաս մաքսային մարմին՝ դա կայացնելուց հետո 10 օրվա ընթացքում կամ ՀՀ վարչական դատարան երկու ամսվա ընթացքում:

ԻՐԱՎԱԲԱՆԱԿԱՆ
ՎԱՐՉՈՒԹՅԱՆ ՊԵՏ՝



Ա. ՄՆԱՑԱԿԱՆՅԱՆ